

列仙傳目錄

卷上

赤松子

寧封子

馬師皇

赤將子輿

黃帝

偃佺

容成公

方回

老子

關令尹

涓子

呂尚

嘯父

師門

務光

仇生

彭祖

邛疏

介子推

馬丹

平常生

陸通

葛田

江妃二女



范蠡

琴高

寇先

王子猷

幼伯子

安期先生

桂父

瑕丘仲

酒客

任光

蕭史

祝雞翁

朱仲

修羊公

稷丘君

崔文子

卷下

赤須子

東方朔

鈎翼夫人

犢子

騎龍鳴

主桂

園客

鹿皮公

昌容

谿父

山圖

谷春

陰生

毛女

子英

服閭

文賓

商丘子胥

子主

陶安公

赤斧

呼子先

負局先生

朱璜

黃阮丘

女丸

陵陽子明

邗子

木羽

玄俗

列仙傳

目錄

列仙傳目錄終



國家圖書館. NATIONAL CENTRAL LIBRARY. TAIWAN, R.O.C.

列仙傳卷上

赤松子

赤松子者神農時雨師也服水玉以教神農能入火自燒往往至崑崙山上常止西王母石室中隨風雨上下炎帝少女追之亦得仙俱去至高辛時復爲雨師今之雨師本是焉

甯封子

甯封子者黃帝時人也世傳爲黃帝陶正有人過之

漢 劉向 撰
明 吳琯 校

爲其掌火能出五色煙久則以教封子封子積火自燒而隨煙氣上下視其灰燼猶有其骨時人共葬於甯北山中故謂之甯封子焉

馬師皇

馬師皇者黃帝時馬醫也知馬形生歿之診治之輒愈後有龍下向之垂耳張口皇曰此龍有病知我能治乃鍼其唇下口中以甘草湯飲之而愈後數數有疾龍出其波告而求治之一旦龍負皇而去

赤將子輿

赤將子輿者黃帝時人不食五穀而噉百草花至堯

帝時爲木工能隨風雨上下時時於市中賣繳亦謂之繳父云

黃帝

黃帝者號曰軒轅能効百神朝而使之弱而能言聖而預知知物之紀自以爲雲師有龍形自擇亾日與羣臣辭至於卒還葬橋山山崩柩空無尸唯劍舄在焉仙書曰黃帝採首山之銅鑄鼎於荆山之下鼎成有龍垂胡髯下迎帝乃升天羣臣百僚悉持龍髯從帝而升攀帝弓及龍髯拔而弓墜羣臣不得從仰望帝而悲號故後世以其處爲鼎湖名其弓爲烏號焉

及仙傳 卷一
倭佺

倭佺者槐山采藥父也好食松實形體生毛長數寸兩目更方能飛行逐走馬以松子遺堯堯不暇服也松者簡松也時人受服者皆至二三百歲焉

容成公

容成公者自稱黃帝師見於周穆王能善禱導之事取精於玄牝其要谷神不歿守生養氣者也髮白更黑齒落更生事與老子同亦云老子師也

方回

方回者堯時隱人也堯聘以爲閭士練食雲母亦與民人有病者隱於五柞山中夏啓末爲宦士爲人所劫閉之室中從求道回化而得去更以方回掩封其戶時人言得回一丸泥塗門戶終不可開

老子

老子姓李名耳字伯陽陳人也生於殷時爲周柱下史好養精氣貴接而不施轉爲守藏史積八十餘年史記云二百餘年時稱爲隱君子謚曰聃仲尼至周見老子知其聖人乃師之後周德衰乃乘青牛車去入大秦過四關關令尹喜待而迎之知真人也乃強使著書作道德上下經二卷

關令尹

關令尹喜者周大夫也善內學常服精華隱德脩行時人莫知老子西遊喜先見其炁知有真人當過物色而遮之果得老子老子亦知其竒爲著書授之後與老子俱遊流沙化胡勝苴勝實莫知其所終尹喜亦自著書九篇號曰關尹子

涓子

涓子者齊人也好餌朮接食其精至三百年乃見於齊著天人經四十八篇後釣於荷澤得鯉魚腹中有符隱於宥山能致風雨受伯陽九仙法淮南山安少得其文不能解其旨也其琴心三篇有條理焉

呂尚

呂尚者冀州人也生而內智預見存亡避紂之亂隱於遼東四十年西適周匿於南山釣於磻溪三年不獲魚比閭皆曰可已矣尚曰非爾所及也已而果得兵鈐於魚腹中文王夢得聖人聞尚遂載而歸至武王伐紂尚作陰謀百餘篇服澤芝地髓且二百年而告亾有難而不葬後子伋葬之無尸唯有玉鈐六篇在棺中云

嘯父

嘯父者冀州人也少在西周市上補履數十年人不知也後音其不老好事者造求其術不能得也唯梁母得其作火法臨上三亮上與梁母別列數十火而昇西邑多奉祀之

師門

師門者嘯父弟子也亦能使火食桃李葩爲夏孔甲龍師孔甲不能順其意殺而埋之外野一旦風雨迎之訖則山木皆焚孔甲祠而禱之還而道死

務光

務光者夏時人也耳長七寸好琴服蒲韭枳殷湯將伐桀因光而謀光曰非吾事也湯也孰可曰吾不知也湯曰伊尹何如曰強力忍詬吾不知其他湯既克桀以天下尚於光曰智者謀之武者遂之仁者居之古之道也吾子胡不遂之請相吾子光辭曰廢上非義也殺人非仁也人犯其難我享其利非廉也吾聞非義不受其祿無道之世不踐其位况於尊我我不忍久見也遂負石自沈于蓊水已而自匿後四百餘歲至武丁時復見武丁欲以爲相不從武丁以輿迎而從遁不以禮遂投浮梁山後遊尚父山

仇生

仇生者不知何所人也當堯湯時爲木正三十餘年而更壯皆知其奇人也咸共師奉之常食松脂在尸鄉北山上自作石室至周武王幸其室而祀之

彭祖

彭祖者殷大夫也姓篋名鏗帝顓頊之孫陸終氏之中子歷夏至殷末八百餘歲常食桂芝善導引行氣歷陽有彭祖仙室前世禱請風雨莫不輒應常有兩虎在祠左右祠訖地即有虎跡云後昇仙而去

邛疏

邛疏者周封史也能行氣練形煮石髓而服之謂之

石鍾乳至數百年往來入太室山中有臥石牀枕焉

介子推

介子推者姓王名光晉人也隱而無名悅趙成子與遊旦有黃雀在門上晉公子重耳異之與出居外十餘年勞苦不辭及還介山伯子常晨來呼推曰可去矣推辭毋入山中從伯子常遊後文公遣數千人以玉帛禮之不出後三十年見東海邊爲王俗賣扇後數十年莫知所在

馬丹

馬丹者晉耿之人也當文侯時爲大夫至獻公時復

爲幕府正獻公滅耿殺恭太子丹乃去至趙宣子時
乘安車入晉都候諸大夫靈公欲仕之逼不以禮有
迅風發屋丹入迴風中而去北方人尊而祠之

平常生

穀城鄉平常生者不知何所人也數死復生時人以
爲不然後大水出所害非一而平輒在缺門山頭大
呼言平常生在此云復水雨五日必止止則上山求
祠之但見平衣帔革帶後數十年復爲華陰門卒

陸通

陸通者云楚狂接輿也好養生食橐盧木實及蕪菁
子遊諸名山在蜀娥媚山上世世見之歷數百年去

葛由

葛由者羌人也周成王時好刻木羊賣之一旦騎羊
而入西蜀蜀中王侯貴人追之上綏山綏山在娥媚
山西南高無極也隨之者不復還皆得仙道故里諺
曰得綏山一桃雖不得仙亦足以豪山下立祠數十
處云

江妃二女

江妃二女者不知何所人也出遊於江漢之湄逢鄭
交甫見而悅之不知其神人也謂其僕曰我欲下請

其佩僕曰此間之人皆習於辭不得恐懼悔焉交甫不聽遂下與之言曰二女勞矣二女曰客子有勞妾何勞之有交甫曰橘是柚也我盛之以筥令附漢水將流而下我遵其傍采其芝而茹之以知吾爲不遜也願請子之佩二女曰橘是柚也我盛之以筥令附漢水將流而下我遵其傍采其芝而茹之遂手解佩與交甫交甫悅受而懷之中當心趨去數十步視佩空懷無佩顧二女忽然不見詩曰漢有遊女不可求思此之謂也

范蠡

范蠡字少伯徐人也事周師太公望好服桂飲水爲越大夫佐勾踐破吳後乘輕舟入海變名姓適齊爲鴟夷子更後百餘年見於陶爲陶朱君財累億萬號陶朱公復棄之蘭陵賣藥後人世世識見之云

琴高

琴高者趙人也以鼓琴爲宋康王舍人行涓彭之術浮遊冀州涿一作碣郡之間二百餘年後辭入涿水中取龍子與諸禽子期曰皆潔齋待於水傍設祠果乘赤鯉來出坐祠中且有萬人觀之留一月餘復入水去

寇先

寇先者宋人也以釣魚爲業居睢水旁百餘年得魚或放或賣或自食之常着冠帶好種荔枝食其葩實焉宋景公問其道不告即殺之數十年踞宋城門鼓琴數十日乃去宋人家奉祀焉

王子喬

王子喬者周靈王太子晉也好吹笙作鳳凰鳴遊伊洛之間道士浮丘公接以上嵩高山三十餘年後求之於山上見桓良曰告我家七月七日待我於緱氏山巔至時果乘白鶴駐山頭望之不得到舉手謝時人數日而去亦立祠於緱氏山下及嵩高首焉

幼伯子

幼伯子者周蘇氏客也冬常着單衣盛暑着襦袴形貌歲異後數十年更壯時人莫知世世來誠祐蘇氏子孫得其福力也

安期先生

安期先生者瑯琊阜鄉人也賣藥於東海邊時人皆言千歲翁秦始皇東遊請見與語三日三夜賜金璧度數千萬出於阜鄉亭皆置去留書以赤玉舄一量爲報曰後數年求我於蓬萊山始皇即遣使者徐市

盧生等數百人入海未至蓬萊山輒逢風波而還立
祠阜鄉亭海邊十數處云

桂父

桂父者象林人也色黑而時白時黃時赤南海人見
而尊事之常服桂及葵以龜腦和之千九十斤桂累
世見之今荊州之南尚有桂丸焉

瑕丘仲

瑕丘仲者甯人也賣藥於甯百餘年人以爲壽矣地
動舍壞仲及里中數十家屋臨水皆敗仲死民人取
仲尸棄水中收其藥賣之仲披裘而從詣之取藥棄
仲者懼叩頭求哀仲曰恨汝使人知我耳吾去矣後
爲夫餘胡王驛使復來至甯北方謂之謫仙人焉

酒客

酒客者梁市上酒家人也作酒常美而售日得萬錢
有過而逐之主人酒常醉敗窮貧梁市中賈人多以
女妻而迎之或去或來後百餘歲來爲梁丞使民益
種芋菜曰三年當大饑卒如其言梁民不歿五年解
印綬去莫知其終焉

任光

任光者上蔡人也善餌丹賣於都市里間積八十九

年乃知是故時仕光也皆說如數十歲面顏後長老
識之趙簡子聘與俱歸常在柏梯山上三世不知所
在晉人常服其丹也

蕭史

蕭史者秦穆公時人也善吹簫能致孔雀白鶴於庭
穆公有女字弄玉好之公遂以女妻焉日教弄玉作
鳳鳴居數年吹似鳳聲鳳凰來止其屋公爲作鳳臺
夫婦止其上不下數年一旦皆隨鳳凰飛去故秦人
爲作鳳女祠於雍宮中時有簫聲而已

祝雞翁

祝雞翁者洛人也居尸鄉北山下養雞百餘年雞有
千餘頭皆立名字暮棲樹上晝放散之欲引呼名即
依呼而至賣雞及子得千餘萬輒置錢去之吳作養
魚池後升吳山白鶴孔雀數百常止其傍云

朱仲

朱仲者會稽人也常於會稽市上販珠高后時下書
募三寸珠仲讀購書笑曰直值汝矣齋三寸珠詣闕
上書珠好過度即賜五百金魯元公主復私以七百
金從仲求珠仲獻四寸珠送置於闕即去下書會稽
徵聘不知所在景帝時復來獻三寸珠數十枚輒去

不知所之云

脩羊公

脩羊公者魏人也在華陰山上石室中有懸石榻臥其上石盡穿陷略不食時取黃精食之後以道干景帝帝禮之使止王邸中數歲道不可得有詔問脩羊公能何日發語未訖牀上化爲白羊題其脇曰脩羊公謝天子後置石羊於靈臺上羊後復去不知所在

稷丘君

稷丘君者太山下道士也武帝時以道術受賞賜髮白再黑齒落更生後罷去上東巡太山稷丘君乃冠

章甫衣黃衣擁琴上迎拜武指帝陛下勿上也上必傷足指及數里右足指果折上諱之故但祠而還爲稷丘君立祠焉爲稷承奉之云

崔文子

崔文子者太山人也又子世好黃老事居潛山下後作黃散赤丸成石父祠賣藥都市自言三百歲後有疫氣民歿者萬計長史之文所請救文擁朱幡繫黃散以徇人門飲散者即愈所活者萬計後去在蜀賣黃散故世賣崔文赤黃散實近於神焉

列仙傳

卷上

列仙傳卷上



國家圖書館, NATIONAL CENTRAL LIBRARY, TAIWAN, R.O.C.

列仙傳卷下

赤須子

赤須子豐人也豐中傳世見之云秦穆公時主魚吏也數道豐界災害水旱十不失一臣下歸向迎而師之從受業問所長好食松實天門冬石脂齒落更生髮墮再出服霞絕後遂去吳山下十餘年莫知所之

東方朔

東方朔者平原厭次人也久在吳中爲書師數十年

漢 劉向 撰
明 吳瑄 校

武帝時上書說便宜拜爲郎至昭帝時時人或謂聖人或謂凡人作深淺顯默之行或忠言或戲語莫知其旨至宣帝初棄郎以避亂世置幘官舍風飄之而去後見於會稽賣藥五湖智者疑其歲星精也

鈎翼夫人

鈎翼夫人者齊人也姓趙少時好清淨病臥六年右手拳屈飲食少望氣者云東北有貴人氣推而得之召到姿色甚偉武帝披其手得一玉鈎而手尋展遂幸而生昭帝後武帝害之殞尸不冷而香一月間後昭帝卽位更葬之棺內但有絲履故名其宮曰鈎翼後避諱改爲弋廟闈有神祠閣在焉

犢子

犢子者鄴人也少在黑山採松子茯苓餌而服之且數百年時壯時老時好時醜時人乃知其仙人也常過酤酒陽都家陽都女者市中酤酒家女眉生而連耳細而長衆以爲異皆言此天人也會犢子牽一黃犢來過都女悅之遂留相奉侍都女隨犢子出取桃李一宿而返皆連樊甘美邑中隨伺逐之出門共牽犢耳而走人不能追也且還復在市中數十年乃去見潘山下冬賣桃李云

騎龍鳴

騎龍鳴者渾亭人也年二十於池中求得龍子狀如守宮者十餘頭養食結草廬而守之龍長大稍稍而去後五十餘年水壞其廬而去一旦騎龍來渾亭下語云馮伯昌孫也此間人不去五百里必當歿信者皆去不信者以爲妖至八月果水至歿者萬計

主柱

主柱者不知何所人也與道士共上宕山言此有丹砂可得數萬斤宕山長吏知而上山封之砂流出飛如火乃聽柱取爲邑令章君明餌砂三年得神砂飛雪服之五年能飛行遂與柱俱去云

園客

園客者濟陰人也姿貌好而性良邑人多以女妻之客終不取常種五色香草積數十年食其實一旦有五色蛾止其香樹末客收而薦之以布生桑蠶焉至蠶時有好女夜至自稱客妻道蠶狀客與俱收蠶得百二十頭重皆如甕大繅一重六十日始盡訖則俱去莫知所在故濟陰人世祠桑蠶設祠室焉或云陳留濟陽氏

鹿皮公

鹿皮公者淄川人也少爲府小吏木工舉手能成器
械岑山上有神泉人不能至也小吏白府君請木工
斤斧三十人作轉輪懸閣意思橫生數十日梯道四
間成上其巔作祠舍留止其旁絕其二間以自固食
芝草飲神泉且七十年淄水來三下呼宗族家室得
六十餘人令上山半水盡漂一郡沒者萬計小吏乃
辭遣宗家令下山着鹿皮衣遂去復上閣後百餘年
下賣藥於市

昌容

昌容者常山道人也自稱殷王子食蓬蘽根往來上

下見之者二百餘年而顏色如二十許人能致紫草
賣與染家得錢以遺孤寡歷世而然奉祠者萬計

谿父

谿父者南郡鄘人也居山間有仙人常止其家從買
瓜教之鍊瓜子與桂附子芷實共藏而對分食之二
十餘年能飛走昇山入水後百餘年居絕山頂呼谿
下父老與道平生時事云

山圖

山圖者隴西人也少好乘馬馬蹋之折脚山中道人
教令服地黃當歸羌活獨活苦參散服之一歲而不

嗜食病愈身輕追道士問之自言五嶽使之名山採藥能隨吾便汝不死山圖追隨之六十餘年一旦歸來行毋服於家間暮年復去莫知所之

谷春

谷春者櫟陽人也成帝時爲郎病歿而屍不冷家發喪行服猶不敢下釘三年更著冠幘坐縣門上邑中人大驚家人迎之不肯隨歸發棺有衣無屍留門上三宿去之長安止橫門上人知追迎之復去之太白山立祠於山上時來至其祠中止宿焉

陰生

陰生者長安中渭橋下乞兒也常止於市中乞市人馱苦以糞灑之旋復在里中衣不見污如故長吏知之械收繫著桎梏而續在市中乞又械欲殺之乃去灑者之家室自壞殺十餘人故長安中謠曰見乞兒與美酒以免破屋之咎

毛女

毛女者字玉姜在華陰山中獵師世世見之形體生毛自言秦始皇宮人也秦壞流亾入山避難遇道士谷春教食必葉遂不饑寒身輕如飛百七十餘年所止巖中有鼓琴聲云

子英

子英者舒鄉人也善入水捕魚得赤鯉愛其色好持歸著池中數以米穀食之一年長丈餘遂生角有翅翼子英怪異拜謝之魚言我來迎汝汝上背與汝俱昇天卽大雨子英上其魚背騰昇而去歲歲來歸故舍食飲見妻子魚復來迎之如此七十年故吳中門戶皆作神魚遂立子英祠云

服閭

服閭者不知何所人也常止莒往來海邊諸祠中有三仙人於祠中博賭瓜顧閭令擔黃白瓜數十頭教令瞑目及覺乃在方丈山在蓬萊山南後往來莒取方丈山上珍寶珠玉賣之久久一旦髡頭著赭衣貌更老人問之言坐取廟中物云後數年貌更壯好鬢髮如往日時矣

文賓

文賓者太丘鄉人也賣草履爲業數取嫗數十年輒棄之後時故嫗壽老年九十餘續見賓年更壯他時嫗拜賓涕泣賓謝曰不宜至正月朝儻能會鄉亭西社中邪嫗老夜從兒孫行十餘里坐社中待之須臾賓到大驚汝好道邪知汝爾前不去汝也教令服菊

花地膚桑上寄生松子衣以益氣嫗亦更壯復百餘年見云

商丘子胥

商丘子胥者高邑人也好牧豕吹竽年七十不娶婦而不老邑人多竒之從受道問其要言但食木菖蒲根飲水不饑不老如此傳世見之三百餘年貴戚富室聞之取而服之不能終歲輒止慳慢矣謂將復有匿術也

子主

子主者楚語而細音不知何所人也詣江都王自言甯先生雇我作客三百年不得作直以爲狂人也問先生所在云在龍脊山上王遣吏將上龍脊山巔見甯先生毛身廣耳被髮鼓琴主見之叩頭吏致王命先生曰此主吾比舍九世孫且念汝家當有暴歿女子三人勿預吾事語竟大風發吏走下山比歸宮中相殺三人王遣三牲立祠焉

陶安公

陶安公者六安鑄冶師也數行火火一旦散上行紫色衝天安公伏冶下求哀須臾朱雀止冶上曰安公安公冶與天通七月七日迎汝以赤龍至期赤龍到

大雨而安公騎之東南上一城邑數萬人衆共送視之皆與辭決云

赤斧

赤斧者巴戎人也爲碧雞祠主簿能作水瀕鍊丹與消石服之三十年反如童子毛髮生皆赤後數十年上華山取禹餘糧餌賣之於蒼梧湘江間累世傳見之手掌中有赤斧焉

呼子先

呼子先者漢中關下卜師也老壽百餘歲臨去呼酒家老嫗曰急裝當與嫗共應中陵王夜有仙人持二茅狗來至呼子先子先持一與酒家嫗得而騎之乃龍也上華陰山常於山上大呼言子先酒家母在此云

負局先生

負局先生者不知何許人也語似燕代間人常負磨鏡局徇吳市中銜磨鏡一錢因磨之輒問主人得無有疾苦者輒出紫炁藥以與之得者莫不愈如此數十年後大疫病家至戶到與藥活者萬計不取一錢吳人乃知其真人也後主吳山絕崖頭懸藥下與人將欲去時語下人曰吾還蓬萊山爲汝曹下神水崖

頭一旦有水白色流從石間來下服之多愈疾立祠
十餘處

朱璜

朱璜者廣陵人也少病毒瘕就睢山上道士阮丘丘
憐之言卿除腹中三屍有真人之業可度教也璜曰
病愈當爲君作客三十年不敢自還丘與璜七物藥
日服九九百日病下如肝脾者數斗養之數十日肥
健心意日更開朗與老君黃庭經令日讀三過通之
能思其意丘遂與璜俱入浮陽山玉女祠且八十年
復見故處白髮盡黑鬢更長三尺餘過家食止數年
復去如此至武帝末故在焉

黃阮丘

黃阮丘者睢山上道士也衣裘被髮耳長七寸口中
無齒日行四百里於山上種葱薤百餘年人不知也
時下賣藥朱璜發明之乃知其神人也地動山崩道
絕預戒下人世共奉祠之

女丸

女丸者陳市上沽酒婦人也作酒常美遇仙人過其
家飲酒以素書五卷爲質丸開視其書乃養性交接
之術丸私寫其文要更設房室納諸年少飲美酒與

止宿行文書之法如此三十年顏色更如二十時仙人數歲復不過笑謂九曰盜道無私有翅不飛遂棄家追仙人去莫知所之云

陵陽子明

陵陽子明者銓鄉人也好釣魚於旋溪釣得白龍子明懼解鈎拜而放之後得白魚腹中有書教子明服食之法子明遂上黃山采五石脂沸水而服之三年龍來迎去止陵陽山上百餘年山去地千餘丈大呼下人令上山半告言谿中子安當來問子明釣車在否後二十餘年子安歿人取葬石山下有黃鶴來棲其塚邊樹上嗚呼子安云

邗子

邗子者自言蜀人也好放犬子時有犬走入山穴邗子隨入十餘宿行度數百里上出山頭上有臺殿宮府青松樹森然仙吏侍衛甚嚴見故婦王洗魚與邗子符一函并藥便使還與成都令橋君橋君發函有魚子也著池中養之一年皆爲龍形復送符還山上犬色更赤有長翰常隨邗子往來百餘年遂留止山上時下來護其宗族蜀人立祠於穴口常有鼓吹傳呼聲西南數千里共奉祠焉

木羽

木羽者鉅鹿南和平鄉人也母貧賤主助產嘗探產婦兒生便開目視母大笑其母大怖夜夢見大冠赤幘者守兒言此司命君也當報汝恩使汝子木羽得仙母陰信識之母後生兒字之爲木羽所探兒生年十五夜有車馬來迎去遂過母家呼木羽木羽爲我御來遂俱去後二十餘年鶴雀旦銜二尺魚著母戶上母匿不道而賣其魚三十年乃沒去母至百年乃終

玄俗

玄俗者自言河間人也餌巴豆賣藥都市七九一錢治百病河間王病瘕買藥服之下蛇十餘頭問藥意俗云王瘕乃六世餘殃下憶即非王所招也王常放乳鹿麟母也仁心感天故當遭俗耳王家老舍人自言父世見俗俗形無影王乃呼俗日中看實無影王欲以女配之俗夜亡去後人見於常山下

讚曰易稱太極是生兩儀兩儀生然後有人民有人民然後有生歿生歿之義著明矣蓋萬物施張渾爾而就亦無所不備焉神矣妙矣精矣微矣其事不可得一一論也聖人仰則觀象於天俯則觀法於地日

月運行四時分治五星受制於太微監無道之國吉凶預見以戒王者動靜言語應効相通有自來矣天然雖不言其變化云爲不可謂之無也周書序桑蟠問涓子曰有歿亾而復云有神仙者事兩成邪涓子曰言固可兩有耳孝經援神契言不過天地造靈洞虛猶立五嶽設三台陽精工外陰精主內精氣上下經緯人物道治非一若夫草木皆春生秋落必矣而木有松栢檀檀之倫百八十餘種草有芝英萍實靈沼黃精白符竹嬰戒火長生不死者萬數盛冬之時經霜歷雪蔚而不彫見斯其類也何怪於有僊邪余嘗得秦大夫阮倉撰仙圖自六代迄今有七百餘人始皇好遊仙之事庶幾有獲故方士霧集祈祀彌布殆必因迹託虛寄空爲實不可信用也若周公黃錄記太白下爲王公然歲星變爲甯壽公等所見非一家聖人所以不開其事者以其無常然雖有時著益道不可棄距而閉之尚真正也而論語云怪力亂神其微旨可知矣

列仙傳

卷一

列仙傳下終



國家圖書館. NATIONAL CENTRAL LIBRARY. TAIWAN, R.O.C.